

Polis ta gara ilegalnan y Ministro ta laga nan bay:

Inmigracion por los laga bay numa

ORANJESTAD. (AAN) Ayera merdia tabata tin un discusion formal riba radio pa motibo cu den conferencia di prensa di gobierno, prome ministro y ministro Mary Wever a haci expresionnan cu a lanta stof pisa pa cu asunto di ilegalnan na Aruba.

Ministro Mary Wever a bisa bon cla cu e no ta acepta ilegalidad y cu gobierno su departamentonan mester actua segun ley y cu su persona como ministro sigur no ta tolera pa cu cualequier compania portin ilegalnan den servicio.

Palabranan masha bunita a ser expresa door di ministro Mary Wever y e forma con e mandatario aki tabata papia, lo a laga cualequier Arubiano y extranhero biba na Aruba kere cu porfin e problema di ilegalnan ta worde ataca manera mester ta.

Ministro Mary Wever no a ni caba di expresa su determinacion pa actua contra ilegalnan na Aruba, cu un miembro di prensa a lanza un pregunta pa e ministro y e pregunta a bay rebenta manera un sky bom no. 21 y laga gobierno pasa den un berguensa nacional.

E pregunta cu a ser lanza tabata relaciona cu un caso di detencion di 5 Hindu ilegal cu recientemente a ser gara door di departamento di Inmigracion.

Polis a haci su trabao manera debe ser y durante cu e caso tabata andando informacion a leak pa diferente medio di comunicacion.

Radio Emisora TOP FM tambe a haya informacion riba e caso di detencion di 5 Hindu, di cual segun e prome informenan, ningun papel na departamentonan di gobierno manera DOOV tabata regla.

Ora cu Inmigracion lo a tuma contacto cu DOOV nan a haya di tende cu no tabata tin permit cla pa e Hindunan deteni.

Basa riba informacionnan cu Inmigracion a haya via canalnan oficial nan a sigui haci tramitenan pa cuminsa pone procedimento di deportacion den marcha.

Ministro Mary Wever mes a declara ayera cu mientras cu no tin nada di papel regla pa extranheronan, nan mester bay warda nan peticion pa permit den exterior y ora cu nan permit keda regla e ore ey nan por bin Aruba.

E colega periodista di TOP FM cu a caba di tende ministro Mary Wever bisa con e procedimento di permit ta hinca den otro, a lanza pregunta na ministro Wever relaciona cu e caso di e 5 Hindunan

cu a ser laga den libertad, siendo cu segun Inmigracion nan tabata ilegal na Aruba y nan no tabata tin permit.

Abogado di esnan cu a worde deteni door di Inmigracion a haci su trabao y a cana e canalnan oficial pa defende su clientenan y esaki ta algo normal y pa cu esey ningun hende por punta dede riba e abogado.

E abogado na un dado momento lo a manda un fax pa Polis pa pone nan na altura cu permitnan di e Hindunan cu a worde deteni tabata den keda cla y cu su clientenan no por worde deporta o algo por estilo, y tipo di cartanan asina di abogado ta cartanan standard.

Ora cu ministro Mary Wever a haya su mes den preta pa cu e pregunta haci di parti di e periodista di TOP, Prome Ministro en persona señor Henny Eman a bula aden y cuminsa cuestiona e pregunta cu a worde haci y tambe a cuminsa acusa un radio emisora di ta instiga y mal informa pueblo.

Prome Ministro a bisa cu no tabata tin nada di berdad den e caso di esnan deteni cu papelnan no tabata regla y cu ta e radio emisora cu ta instiga pueblo, mal informa pueblo y ta mete su mes riba tereno di Avonturen verhalen y cu nan no ta busca drechi prome cu nan manda un informacion den publicidad.

Pa cualequier persona cu dos placa di sinti tabata bisto cu Prome Ministro Henny Eman tabata referi na TOP FM y aki e rabo di porco a cuminsa crul pasobra e reaccion di Prome Ministro a lanta indignacion cerca integrantenan di TOP FM y tambe na otro miembronan di prensa cu no ta bay ciegameinte na favor di loke gobierno kier implementa riba pueblo.

Na prome lugar Prome Ministro a bay mete su mes den algo cu no tabata dirigi na su persona y a pone ministro Mary Wever keda para manera un mucha chiquito y mucha manda cu no sa nada y no tabata capacita pa contesta riba su mes, preguntanan haci den Conferencia di Prensa.

Conferencia di prensa di gobierno ta pa duna tur miembro di prensa e oportunidad pa haci gobierno pregunta y esaki ta net loke e colega di TOP FM a haci y nada mas sin kita sin pone.

Reaccion di Prome Ministro tabata uno hopi irita y uno di falta di respet basa riba tilda un o mas medio di comunicacion sin menciona number.

Rapport Calidad ta permiti un Prome Ministro di Pais Aruba lanza acusacionnan contra un medio di comunicacion sin menciona number di e medio?

Esaki ta ser yama tira piedra sconde man y trata di ridiculiza un

medio di comunicacion cu pa colmo gobierno mester di dje pa informa pueblo, mescos cu tur otro medio di comunicacion na Aruba sin importancia di nan grandura.

E asunto di e Hindunan cu a worde deteni a lanta rabia den Cuerpo Policial cu a haci su trabao y un biaha mas a keda para manera un set di mucha payaso cu despues mester a dobla rabo y laga esnan cu nan a detene bay pasobra gobierno su ministronan den pura a core fix tur papel pa esnan deteni.

Den e caso aki no ta ministro di Husticia ta esun cu mester a actua y tabata e unico cu por a fix den pura tur papel pa esnan deteni?

Mirando cu ministro Vos ta hopi malo den exterior, Prome Ministro di Aruba Henny Eman ta reemplaza ministro Vos y no ta Henny tabata e ministro cu lo mester a core duna orden pa fix tur papel pa esnan cu tabata deteni?

E biaha aki culpa no por worde tira riba ministro Vos!

Ministro Mary Wever no por worde culpa pasobra el a trata di haci su trabao manera debe ser, pero ayera publicamente den conferencia di prensa di gobierno prome ministro a core pasa su dilanti pa camufla un pifia formal di gobierno cu e muestra di ta midu cu midinan cu ta cumbini gobierno ora cu nan ta haya ta bon y pa

kende nan ta haya ta bon.

Prome Ministro a bay asina leu di laga un pregunta habri encunto actuacion di e abogado y bisando cu si e abogado a manda un fax cu X contenido pa polis anto atencion di e abogado mester worde hala!


E abogado si a haci su trabao y si Prome Ministro kier papia di hala atencion di e abogado e ta lubida cu e no tin ningun competencia pa hala atencion di ningun abogado y cu ta Orden di Abogado so tin tal competencia o gobierno mester hiba e abogado corte.

Ayera DIARIO a haya reaccion furioso di comunidad Latino, Filipino y mas extranheronan legal biba na Aruba cu tabata punta nan mes si diferencia di nacionalidad ta algo cu gobierno tin diferente midu pe?

Den Cuerpo Policial awor e animo un biaha mas a yega punto zero y nan ta punta nan mes, si nan mester hiba e mesun maneho cu gobierno ta hiba esta esun di Los Laga Bay, pasobra nan no por sigui detene ilegalnan y gobierno mes ta bay contra tur regla y contra tur ley pasobra ministronan ta kere cu nan ta para riba ley y por haci loke nan ta haya ta bon.

E asunto aki no a caba ainda pasobra aparentemente tin documentonan ta circula cu ta muestra bon cla cu gobierno a pega barco mahos.

ESAKI TA TRANSPARENCIA Y CALIDAD!!



Debi na airconan tin

Biblioteca Hubenil
cera

ORANJESTAD. (AAN): Biblioteca Nacional Aruba a indica cu pa motibo di fayden e sistema di airco, Biblioteca Hubenil na sucursal San Nicolas ta cera te proximo aviso.